

In d' Luur

Verdredelk, vergrellt un verdreih

Van Karin Böhmer



De Winter kann een lang worden. Corona, Corona un nix as Corona. De een is bang, sük antostecken, un is daarom upgeregt. De anner hett de Snoot bit an d'Ohren vull un will nich langer torüggsteken. So of so: De Lüü worden all vergrellter un verdreihter. Un daarto kriegen wi jümmers mehr Experten. Vergangen Johr gung dat ja noch daarom, dat vööl Lüü mehr van en neei Virus wussen as de Dokters. Se kunnen de Studien beter verstahn. Un se funnen in 't Internet dusende van Berichten daaröver, wo dat mit dat Virus all würelk kamen is un well sük dat utdocht hett, um de lüttje Mann vör all Tieden unner de Knut to kriegen. Disse Lüü sünd ok immer noch nett so slau. Man nu komen d'r noch welksen to, an de 'n Gesundheitsminister verloren gahn is. Se wussen all vör Maanden, dat en Impfstoff funnen word un wovööl daarvan bestellt worden mutt. Well as Eerste impft worden mutt, weten se ok beter as de, de 't to seggen hebben. Wat weren wi 'n Enn wieder, wenn de Lüü all dat wahrseggt harren, wat se nu beter weten. Man disse gewaltige Klookheid, de d'r woll achter sitten mutt, geht dummerwies unner in Schellen und Verdreihwesens.